


Jan Castagno

Mèstre en Gai-Sabé

Per moun Païs



C.I.E.L. d'Oc

Centre International de l'Écrit en Langue d'Oc

3 Place Joffre, 13130 Berre L'Étang
<http://www.lpl.univ-aix.fr/guests/ciel/>

Per moun Païs

(Pouèmenet)

Escoutas, Poples, se voulés !...

.....

Allègre per touto coutrò,
Ma soulo e pichoto Patriò,
Eissam valient de fièrs Galès.
Crema dau fioc que me gresiho,
Dins l'or dau sourel que brasaho,
Trase un belug de pouèsio.
Sus tus, sòu benesi d'Alès.

La Ceveno a clina l'esquino
Per t'apausa pròchi Gardou,
Que cascaio soun rigaudou
De-long toun alo coumtadino.
Ta visto encanto lou regard;
Siès la pèrlo fino dau Gard;
Siès un pouz d'or; siès un lugard;
Siès lou flambèu que m'ilumino.

Alès, toun cièl a lou velout
Das cièls blavents de l'Italò;
Tous sèrres fan nico à l'Aupiho;
Ta Pradarié n'es qu'uno flou.
Tas coumbos sanglou de lourdiges;
Tas auros soun fouligaudiges;
Siès soustado das fols auriges;
Siès un ort de tutto bèlou.

Tous vièls aubras cantou ta glòrio:
Euses, blacas, pi ns, castagniès,
Vèrnes e besses, coudouniès,
Tihuls ramas davans tas bòrios.

Pivolos e micocouliès,
Oumes, platanos, amouriès,
Aubos blancos e bruns nougiès,
E lous qu’aublido ma memòrio.

Per tous bos, quau trèvo, courous,
Lous draïous e camis de lebres,
Aviso agalanciés, ginèbres,
Brus, espics (amai d’amourous);
Ginèstes, frigoulo, pourraco,
Mentàstre, sauvio à pleno saco,
Ramo-counil que tèn la raco,
Lou bouis sacra verdal e rous.

Milanto menos d’aucelihos
lé fan lus nis au renouvèl:
Quinsous e caios, bartavèl,
Roussignòus, mèrles, cardounihos,
Ceseros, cocho-chats e rals,
Lèbres, counils e perdigals,
Que, bèn aprestas, soun regals:
N’i’a trop que moun fais s’en desliho.

Dins tous jardis vèn lou roubal,
A tas tèulissos l’iroundello,
E la cigalo crissarello,
L’estiéu, pertout, lèvo lou bal.
Lou chot, la pupudo, l’agasso,
Lou courpatas, lou duc, l’eiglasso,
Lou mouisset fin, la tartanasso,
Per tous roucans menou rambal.

Dins tas pradellos las braietos,
Las margaridos, lous viéuliès,
Lous rousergas, lous pissauliès,
Las anedos e las viéuletos,
Jaussemin, serpoul e flajòus,
Muguets, girouflados, glajòus,
Rosos, linlas e barbajòus
Ié greiou per plenos carretos.

Dins toun terraire pôuderous,
I’ a touto flou, i’ a touto fruchò
— Car culis, lou Raiòu, se bucho ! —

Recordo lou meloun goustous,
Aubricots, figos, abelanos,
Prunos e peros, mióugranos,
Poumos, coudouns, amenlos sanos,
Tout ço qu'es bon i'es aboundous.

Frèses, espargues, aubèrginos,
Poumos d'amour, rabes, caulets,
Cauflòris, cardos, flajoulets,
Faviòus granas, bledos, vièrginos.
Aigretos, carotos, courals,
Peses, coudoumbres estivals,
Ceses, nabets, àpis verdals,
Tout ço que lou sup s'imagino.

Cebos, aiets, - verts espinards,
De rabos e de bledos-rabos,
De pan-fourment, de grossos favos,
Goustouses dins la soupo au lard;
Mai de dès menos d'ensalados,
Lachugos, roumanos, frisados..
Las escaronlos, las poumados...
Arrestèn-nous que se fai tard

A tous eissams i'a mèu en brescos,
E dins tous riéus griòu brusis,
E la fino troucho lusis
As rajòus de tas aigos frescos.
Ta tousello fai bon pan blanc,
As de fartaio per tout l'an,
E de tartifles atenan,
As de rasins à plenos descos.

I'a d'óulivo à tous óuliviès,
Se ié rassolou per pognados:
Au moulin d'infèr esquichados
Fan l'òli d'or qu'un diéu beviè.
Toun vin es mai que picourèio,
Es un neitar de l'Empirèio
Que lèu fai dansa la bourrèio
A tous gandard, à tous bouviès,

As mai la goustouso castagno,
Teto, afachado, bajana,

Dau Raiòu famous dejuna,
Manno d'ivèr dins la mountagno.
As gai sourel, as lou bon èr;
De traval l'estieu e l'ivèr;
Mandes Misèro al diable vèrt:
... Alès siès caire de caucagno !

Aublide pas toun magna d'or,
Paumudant tres fes dins sa vido:
Parpaiou, vèrme, crisalido,
Que quatre cops sinjo la mort.
E que misteriouso arrugo,
Quand l'amadurun lou pessugo.
Au magnaguiè qu'elor l'embrugo,
Fai lou fousel qu'es un tresor.

De-qu'as pas per batre mounedo !...
As la galino que fai l'iòu,
La vaco, lou chival, lou biòu,
Lou cabri que sauto la cledo.
As la pintardo, lou dindard,
Lou pijoun, l'auco, lou canard,
Lou garrèl que te tèn de lard,
As lou lanu troupèl de fedos.

Que fai gau per ta Pradariè,
Dins l'embriaigun de la pasturo
D'adouumesca soun mau-d'enduro,
Aublidant l'aigro penarié.

Encaro mai en roumavage
Sus Sant-German, sus l'Ermitage,
Sus lou sèrre oumbtru d'en Sauvage
Que porto pòu, quau hou creirié !

Aime treva toun val d'Areno:
M'estrigougna sus sous roucans;
Souto sous rouves de milo ans
Ausi la vouès dau bos que reno;
Las sounaios dau blound troupèl,
La vaco bramant soun vedèl,
Lous pastres pifrant lou rampèl...
Acò me tèn l'amo sereno.

Bèn faire déu toujour s'ausa !
Travaiadou de mas Cevenos,
Tus que t'esquines dins las penos,
Dau brès au cros sans te pausa,
Sus toun front valient vole traire
Lou lausiè dau bon travaiaire:
Toco la man, Païsan, moun fraire,
Siès lou proumiè que fòu lausa !

Pièi anarai nista las Forjos
E lus furnelas infernaus,
Ounte la founto das tinaus,
Pisso, feroujo, à pleno gorjo;
Ounte fourfouiou milo óutis,
Ounte en aram tout se bastis,
Ounte d'infèr tout se vèstis,
Ounte on diriè que tout s'esgorjo.

Alin, Salindros ! Enfiéucas,
Sous oubriès glissou, panles glàris;
Arquemistos, abouticàris,
Fan d'aigo-forto das roucas.
I'a de fours cremant lou saupèstre,
Ço que n'en sort sèmblo pas èstre..
Naturo, uei, l'Ome es toun mèstre,
Fai çò que vòu de tout ço qu'as.

E souto-sòu n'en sount que minos,
D'ounte sort lou riche carbou,
Que d'óutissasses à vapou
Van arpuga dins sas jassinos.
Salut, minaire desfara,
Carbouniè sourne e mascara,
Gràço à tus lou fioc caufara:
Salut ! eros de la toumplino.

Faudrié l'engèni de Mistral,
Moun Alès, per canta tas fihos,
Finetos chatos, caros mihos,
Pèrlös d'amour au cor astral.
E tous jouvents bàstis au monle,
Noumbrouses per lous counturonles,
Senus, garrus, ni baus, ni gonles,
Bons Francés, bons fiéus e bon gals !

As d'oubriès per touto requisto,
D'engincaires per tout traval...
Pot s'espincha d'amount, d'aval,
Tout fournigo à pèrdo de visto.
E quante los de coumerçants,
De mestièraus sèmpre es-avans,
D'omes de pes e de savants !...
As mèmo un escachou d'artistos:

Esperits forts e saberus
Que fan lusi sus ta téulado
La lumenouso soureiado
De quau tetè lou lach bourru.

A vautres, jouvents, cride: Arri I
Per lou que vòu i'a ges de bàrri
Sès de braus francs, tiras lou càrri...
Semenas !... Prou vendra lou fru !!!

MANDADIS

Ah ! qu'es dous, quand la rimo canto,
Coumo au sourel canto lou gal,
De canta moun Païs bourgal
Embé la lengo que m'encanto.

Adounc ALÈS, noblo ciéuta,
De l'Empirèio enfant gasta,
Te souvète en tutto amista,
Milanto ans de vido-vidanto

Jan CASTAGNO.

Tèste integrau

Còpi interdicho

Reserva pèr aquéli qu'an la licènci d'utilisacioun

C.I.E.L. d'Oc

Centre International de l'Écrit en Langue d'Oc

Sèti soucian:

3, plaço Joffre - 13130 Berro.

Tóuti dre reserva - Tous droits réservés - All right reserved.

© Centre International de l'Écrit en Langue d'Oc - 1997

© Adoubamen dóu tèste, de la meso en pajo e de la maqueto pèr Bernat Giély,
en sa qualita de mèmbre dóu Counsèu d'Amenistracioun dóu CIEL d'Oc.

